

तुबारि संपादकीय टीम

◆अस इ उम्मिद करुं लगे
से कि एण बाड़े दिन
अन्तर सुआ मेहणु इस कम
अन्तर सहयोग कते।

◆इस तुबारि मासिक पत्रिका
समाचार पत्र एकट अन्तर
रिजिष्ट्रि नेई भो। सिर्फ पांगि
घाटि अन्तर पहुँ जे इ पत्रिका
शुरु किओ सि।

◆तुबारि यक अवाणिज्यिक
पत्रिका भो।

◆तुबारि पत्रिका कोइ मेहणु,
जनजाति, त संस्कृति गलित
कठेण जे नेई छपाण लगे। अगर
कोइ ई सोचता बि त अस
जिम्मेवार नेई।

◆छपाणे पेहले सोभ आर्टिकल
दुई टाई पांगेई मेहणु हरालो
असे। इ त खुलि बोक असे कि
पेहिल बार पांगवाडि लिखणे
सुआ मुश्किल भुन्ति त गलति
बि भुन्ति। अगर कोइ लिखणे
गलति असे त असे जे जरूर
बोले। त अस तसे होरे संस्करण
पुठ ठीक करणे कोशिश कते।

◆आर्टिकल्स ना मिलए, या
घाटि मेहणु के मदद ना मिलए
त तुबारि पत्रिका कदि बि बंद
भुई सकति।

◆कोइ चित्र छपां सि या नेई
छपां जे तुबारि संपादकीय टीम
पुरा अधिकार असा।

◆अस किलाइ केन्द्रीय
पुस्तकालय, त बजार राखे ठेके
भेड हरिरामे दुकान अन्तर
तुबारि ड्रॉप बॉक्स पुठ बि अपुं
सझाव ओर आर्टिकल्स रखुं जे
सुविधा किओ असे।

◆अस सोभि पांगि
मेहणु जे हात जोड़ कई
निवेदन कते कि, तुस
बि कोइ अच्छा आर्टिकल,
पुराणि या नौई कथा,
कहावत, कविता, त
नौवे घीत (पांगवाडी
अन्तर) लिख कइ छपां
जे हेंनदे दिए।

तुबारि संपादकीय टीम

☎ 9418431531

☎ 9418429574

☎ 9418329200

☎ 9418411199

☎ 9418411599

तुबारि संपादकीय टीम कनारा सोबि पेंगेई
मेहणु जे नौआ साले-2013 बधे, तुस सोब खुश
लोते रेहो त तूं सोब कम खरे बणो लोते!

हैं हिमालय फाट पुठ खतरनाक भुन्जुल एणे बाड़े असे।

धरती पढे रिसर्च करणे बाड़े वैज्ञानिक त हिमालय पहाड़ पढे रिसर्च करने बाड़े भूगोल वैज्ञानिक बोलोसु कि, भारत केआं तिब्बत तक फाटि-फाटि अन्तर खतरनाक भुन्जुल एणे बाड़े असे। भारत त एशिया धरती पढे प्लेटि के बिच collision ढक्का लगणे बोलि हिमालय पहाड़ हउ बडण लगोअसा। एन्हि दुई प्लेटि के ढक्का लगणे जगा जे मुख्य हिमालय ढक्के बोते (Main Himalayan Thrust -MHT)। विज्ञान इस मुख्य हिमालय ढक्की पुठ सुआ रिसर्च करण लगो असा, भारतीय राष्ट्रीय भौगोलिक शोध शिक्षा वैज्ञानिक (National Geophysical Research Institute of India)के मददे बोलि अमेरिकन भूगोल वैज्ञानिके, दुइ साले रिसर्च कई कइ पता, पता लगो असा कि, हिमालय फाटे धरती पढे यक प्लेट बीह मील दक्षिणे कनारा उनया घेई गोसी, एसे बोलि 9 मागनिटुड (9 magnitude) केआं खडिया भयानक भुन्जुल एई सकता बोल छौ असु। तेन्हि बोलो असु कि, भयानक भुन्जुल एणे डेट, न बताई सकते, ओर रोक बि न सकते सिर्फ आपदा प्रबंधन योजनाई मदद कई सकते।

भूगोल वैज्ञानिक काल्डवेल जे बेहिं बोलो

असु से 4 दिसंबरे 2012 एमेरिकन भूगोलभौतिक संगठने ओठ (American Geophysical Union) अन्तर बोलो असु त हिमालय भूगोलभौतिक शिक्षा विभाग शुरु किओ असे।

शुई असि जुओई कि भुन्तु कोई मेहणु न जाणता, सिर्फ असि बणाणे बाड़े परमेश्वर पता असा। ज्ञानि बोते कि मेहणु मरं कैआं बाद अपु सोब धन दौलत इठि छाड़ दी कइ सिर्फ तेसे आत्मा इस संसार कैआं बेहर घेन्ति। अपु आशा, असि बणाणे बाड़े परमेश्वर पुठ रखि कइ अपु कम, व्यपार सही ढंग जुओई करणे बोलि, हैं आत्मा स्वर्ग अन्तर घेन्ति, तउं असि मौते बोलि डरणे जरूरत नेई। “साईस डेलि” अकबार कैआं असि इ आर्टिकल अनुवाद किओ असा।

(Himalayas may experience major earthquakes: study Agencies : Washington, Wed Dec 05 2012,)



भारतीय राष्ट्रीय भौगोलिक शोध शिक्षा वैज्ञानिक के मददे बोलि अमेरिकन भूगोल वैज्ञानिके, दुइ साले रिसर्च कई कइ पता, पता लगो असा कि, हिमालय फाटे धरती पढे यक प्लेट बीह मील दक्षिणे कनारा उनया घेई गोसी, एसे बोलि 9 मागनिटुड (9 magnitude) केआं खडिया भयानक भुन्जुल एई सकता बोल छौ असु।


यक लिंगी यक नैऊं थिऊ। तेस नऊं चीकु थिऊ। यक रोज से अपु जुओलि जुओई यक बर्गीचे अन्तर घुमु जे गो थिआ। चीकु बोता ई हैं लकड़ दादु बग भो सिगालि एस पुठ कब्जा कई छा। तऊं तेसे जुओलि यक बुटे पुठ मीठे-मीठे फल हिलते काए त तसे मुंह अन्तर पोणी भोईगड। तेनि चीकु जे फल टाई कई अणु जे बोलु, तऊं चीकु बोता न ए बग यक सिगालि भो जे सुवा खुंखार असा अगर तेस पता लगा न कि फल असी टाई काई खो असे त से असी मारि छान्ता। पर चीकु जुओलि तेसे समझाणे बोली न मनि हारि कई चीकु फल टोड़ण जे घेण अऊ। चीकु फल टोड़ण लगा त तिखेई तठि सिगालि एईगा चीकु फल घिन कई दौड़ा त यक ड्रम अन्तर घेई गा। पता फल तेस अन्तर छड़ दी कई चुपचाप बेहर एई कई खेड़ि गा। तिखेई सिगालि तठी एईगा तेनि चीकु कैआं पुछु तेई इठिया यक नैऊं काऊ न फल नेन्तु। चीकु समझी गा कि सिगालि से नेई पछाणों तूं तेन बोलु अभेई मेई यक नैऊं इस ड्रम अन्तर घेन्तु काओ थिऊ। तेस केई सुआ फल थिए। सिगालि ड्रमे भेड़ गा तेठि तेस फलि के मुशक आई त सिगालि नैऊं मारुण जे ड्रम अन्तर घेई गा। चालाक चीकु झटपट ड्रमे ढकुण दी छऊ। सिगालि ड्रम अन्तर मरिगा। चीकु त तसे जुओलि फिर अपु लकड़ दादु बर्गीचा वापस नि छड़ा। चीकु अपु बुद्धि बई अपु त अपु जुओलि जान बचाई त तेस बर्गीचे मालिक बि बणि गा।

कुछ खास खबर

- ♦ राजा वीर भद्र सिंह छठे लिंगि हिमाचले मुख्य मन्त्री बण गो असा। एस बजहि जुओई पेंगेई मेहणु चेनही सुरुगें बड़ी आस असि।
- ♦ हैं विधायक ठाकुर सिंह भरमौरी हिमाचले वन मन्त्री बण गो असा।
- ♦ साक्षर भारत प्रोग्राम अन्तर पेंगेई 5018 मेहणु अन्तरा 4519 मेहणु अप्पु पेपर दी छो असे त तेन्हि सोबि सर्टीफिकेट बि मेई गो असे।

गुरु जीए यक गभुर कैआं प्रश्न पुछा कि

By Shubham



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

मुटणे यंत्र बिमारी

मुटणे बिमारी पढि अन्ना साप सुथरे न रखणे बोलि एन्ति। 75% ए बिमारी, ई.कोलई (E.Coli) नाउंए किटाणु बोलि एन्ति, छोठ अन्तर ई किटाणु सुआ भुनते। छोठे बोलि ए किटाणु पतुआ भेड़ि चमड़े जुओइ लगते, तऊं ए किटाणु मुटणे ऑटोडि बोलि मठे-मठे हैं जिसम अन्तर घेइ कई बड़ते घेन्ते, त पहले मुटणे ऑटोडि अन्तरि बिथ, पता थेलुडु अन्तरि बिथ, तड़िआ पता युरिटर्स त गुर्दे अन्तरि बिथ बि खाई छते, तऊं त एस बिमारी बोली असि सुआ तकलिफ भुनती। **मुटणे यंत्र बिमारी कीं रोक सक्ते?** गरमी सिजन अन्तर अस हर रोज सन्हू कते, अन्तरि बई डबणे झणे बी बदलते, एसे बोलि पढि जगा साप भुन्ति त ई.कोलई किटाणु बड़ि कई मुटणे नडकी/मुत्र बहिनि अन्तर घेणे टेम न मेता, तऊ त ए बिमारी गरमी सिजन अन्तर न एन्ति। पर हिऊंत, ठण्डयार मेहणु सन्हू घट कते, एसे बोली पढि जगा साप न भुन्ति तऊ तेन्हि किठाणु बड़ कई, मुटणे ऑटोडि बई अन्तर घेणे टेम मेता त अस अपेप खुद बिमारी बणणे मोका देन्ते। मुटणे बिमारी त धात बिमारी रोकुण जे, मठड गबुरु झणे त गुआपिड सुसुर धोइ कई धूप शुखाणि कई त मेहणु अपेप बि, व्यागे त व्यादि पढे जगा साबुणे बई सुसर साफ कई कइ, अन्तर डबणे झणे बदल कई ओर कम से कम दुइ लिटर पोण हर रोज पीणे बोलि मुटणे यंत्र बिमारी कैआं सोब दूर रेइ सक्ते।.....Dr. Dhanunjay